

十一門論疏

序
卷一之一
卷一之二



十二門論序疏

姚秦釋僧叡序

唐京師延興寺沙門吉藏疏

大業四年六月二十七日疏。一時講語。此序理深
事博。言約義周。略曉六條。方乃可讀。一須深見論
意。二精通法華。三妙識般若。四善鑒老莊。五博尋
儒典。六巧制文章。余昔已著三論文。立正言。序是
人制。不我釋之。但師每講。常讀此序。而淺識之流
意多紛謬。故略陳綱要。以賜門人也。

序爲六分。一標大宗。二釋題目。三敘造論意。四讚

論功能。五讚論利益。六作者謙讓。

十二門論者。蓋是實相之折中道場之要軌也。

第一標大宗。折中者。折物令齊。謂之折中。書云。片言可以折獄。斯論明生死涅槃萬化之法。卽是實相。故云實相之折中也。所以作此語者。凡有二意。一者欲稱歎斯論。二者指斥餘人。餘人凡有四人。皆明實相。並折而不中。一者世俗之道。皆是安家全國不淨之法。非實相之折中也。二者九十六術。欲明正道爲真。並是虛妄。非是實相。故折而不中。三者五百小乘論師。各執諸法。相有決定相。不信。

畢竟空法亦是明實相而不折中。四者有所得大乘學人方廣之例。雖信畢竟空。鈍根自害。如不善呪術。不善捉毒蛇爲空見所害。亦是折而不中。故指斥餘人也。今稱歎龍樹此論明實相而是折中。故言實相之折中也。問云何爲實相。答。觀師後釋之。凡有十不謂不內不外。不人不法。非緣非觀。不實不虛。非得非失。故名實相。

道場之要軌者。實相謂所觀之境。道場卽能照之。慧非實相。無以生實觀。非實觀無以照實相。雖境智宛然而實緣觀俱寂也。此之二句。無理不該。無

言不攝十二門與中論名部雖異斥病顯道其義大同實相卽是中道也。道場謂正觀也。宣之於口謂之論也。又實相卽實相般若道場之照觀照般若。宣此二義謂文字般若也。又實相卽境界佛性。道場謂觀智及菩提果性。在觀旣明累無不寂卽果果性。說四爲開非境非觀不智不斷卽中道正性也。故坐道場見佛性方得成佛。宜作此釋之。問。何故明道場復云要軌答。中論法品云。得實相有三種。謂三乘人。涅槃云。見中道者有其四品。下智觀故得聲聞菩提。乃至上上智觀故得諸佛菩

提。今欲簡彼二乘。二乘未窮實相之原。大士方盡其理。故偏言道場也。要軌者明實相之軌。凡有三論。一無畏之廣。二中論處中。三此論之略。在言雖略。而爲入道場之要故也。有諸大乘論。言廣難尋。斯論辭略顯詣。故云要也。叡師復明悟實相故。則凡得二益。一六道迴宗。三乘改轍。謂累無不盡。次整歸駕於道場。畢趣心於佛地。謂德無不圓。卽其事也。又實相卽如。如異名。謂如如境。道場卽如如智。斯二卽是二法身。宣此二種名爲應化現金光。明三身品。攝論實相卽法身。道場之照。謂內應身。

說斯二義謂外應身化又實相卽本有涅槃道場
之照卽始有之義。並是無名相中假施名相。說隨
處立名。今示此論深博。故略敘眾義。又此論通釋
大乘教。則無義不攝。故備含一切也。

問。序者依何文作此說。答。後云大分深義。所謂空
也。卽是實相。通達是義。具六波羅蜜。無所障礙。謂
之道場。

十二者。總眾枝之大數也。

第二釋題目。三字卽三也。十二是一方大數。治病
通經。枝謂支別。卽十二不同也。一科法也。更有餘

義文疏已述。

門者開通無滯之稱也。

籍十二言教開實相之妙理。通行人之觀心也。餘義文疏既陳。

論之者欲以窮其源盡其理也。

論之者釋論也。窮其原者窮三乘之原也。原唯有一旨。權說有三。而封異者未尋其本。故謂有三耳。若考而窮之。唯一原也。故無量義云。從於一法生無量義。其一法者。卽無相也。如是無相不相。名爲實相。法華云。於一佛乘。分別說三。涅槃云。是一味。

藥隨其流處有六種味。乃至亦有三乘之味。皆是明一原也。盡其理者。上令三乘徒轍。今令六道迴宗。此論既正釋一乘。令九道眾生同成佛也。問破三何故云窮原。洗六而云盡理。答。原。理。名。殊。體。一。從一原而有三流。三乘諸子未窮其源。故謂三異。若從流以尋原。則知原唯一。則便捨流以還原。六道既其失道。故是乖理之義。所以須明盡理也。又窮其原。斥聖惑也。盡其理。破凡迷。卽令悟不凡。不聖。不生死。不涅槃等也。又窮其原。斥內迷也。盡其理。破外執也。諸論義師未尋其本。有五百部異。若

窮原者知理唯一也。九十六術自謂得理，故異道紛然。若盡理者，則眾異息矣。又窮其原，破學大乘人成有所得執也。盡其理者，斥學小乘之流也。以未盡理，故有小耳。如其盡理，既無二，何有大小耶。然本對異流，故言一耳。若捨異而存一，乃至五百，皆是未窮其原。未盡其理，宜深照斯意，方見作序人心。

若一理之不盡，則眾異紛然，有惑趣之乖。

上二句標兩門。今雙釋也。以不盡理，故有六道惑趣之乖。惑者迷也。趣者理也。謂迷一道，故成六道。

一源之不窮則眾塗扶疏有殊致之跡。眾謂多也。塗即道以不窮原故有三乘異道乃至五百部也。扶疏謂開廣增盛之義耳。殊致之跡者殊者異也。致理也。跡謂足跡。即三乘足跡而不混寂。何猶得成佛耶。

問。何故作此釋論字耶。答。若直釋者。應云。交言曰。論。然今叡師釋三字。三意明之。若釋十二。取其數之大意而釋。謂此十二無病不除無教不顯無理不申無觀不發。故一方數圓。故云十二也。次釋門。訓名依字釋之。今釋論取論意及論功能以釋論。

非訓名而釋何以知之。文云論之者欲以窮其原盡其理。故知就意及功能釋也。

殊致之不夷。乖趣之不泯。大士之憂也。

第三敘造論大意也。又開三別。初辨造論緣由。二正明造論。三明造論利益。大士初建弘誓。令九道眾生皆歸一極。今遂保著三乘。封執六道。豈不憂哉。

是以龍樹菩薩開出者之由路。

上是悲心。今是悲事。又上是大悲內充。今方便外救。卽吐言作論也。有二。前總唱十二次正言造論。

今卽初也。出謂令六道出分段。三乘離變易同免。二種火宅所燒。故云出也。出必有所因。故以十二門爲出者之由路。假斯路而出也。

作十二門以正之。

前總標由路。今敘由路事。六道三乘並皆失道。是故稱邪。蕩彼邪迷。故作十二以正之。三乘六道並是邪路。今十二門是正路也。問云。何令六道迴宗。答有三畢竟空。如百論述之。一者六道本來寂滅。故畢竟無六。二者虛妄。故無六。謂六道亦無六趣。如渴人見燄。內六處水流。實無六趣。三者諸佛菩

薩隨六說六亦無六趣如隨見水人說有六水實
無有六以悟六本不生故六道迴宗也三乘徒轍
者二乘折法未悟本空大士雖知本空照猶未盡
今此論顯畢竟空諸佛行處令三乘人究竟了達
故門門之中皆稱畢竟空智度論云畢竟空是諸
佛所行故也問云何爲開路塞路答有二種塞一
六道舊迷二學教封著今除此兩梗做十二之路
從一一路皆入實相也

正之以十二則有無兼暢事無不盡

第二正明造論凡有五轉十不謂不內不外不法

不人。不緣不觀。不虛不眞。不得不失。其言巧。其義深。其文約。其理富。無病不破。無教不申。無理不通。無緣不益矣。今初破內病。病乃萬端。有無爲本。又是障中道之根。又如來常依二諦說法。以不達因緣有無二諦。故成性有無二病。二諦旣無教不該。二諦之迷亦無迷不攝。又小乘多著有病。學大者多滯無病。又凡夫著有。二乘滯空。又愛多者著有。見多者著空。是以斯論破此二也。問但破有無亦申有無。答具二義。要先破有無。方申有無。故下文云有二諦。卽其事也。又云但解釋空申第一義也。

通達空則通大乘。具足六度。謂世諦也。問云何爲兼暢。答有三種義。一破有後破無。故云兼二。申世諦復申第一義。故云兼三。病無不破。教無不申。暢大士之懷。故云兼也。暢亦三。一有無病除爲暢。二者二諦教通爲暢。三暢佛菩薩心爲暢也。

事盡於有無。則忘功於造化。

上破內迷。今斥外執。斯論正破於內。故先斥內。傍破於外。故後除外。造化者。莊周云。魍魎因影。影由形。形因造化。造化不知所因。今寄斥震旦莊周。以破天竺外道。良由此土無別外道。又一言之內。彼

此雙盡故斥此阿彼也。問此論何處破造化耶。答作者門破自在天。卽是其事。以自在天能造化萬化。故名造化。問何故破自在耶。答有無是內迷之本。造化爲外執之根。故伐其本而柯條自壞也。問何故事盡有無則亡功。造化答破有無非但內病得除外。造化亦壞而稱亡功者。惑者執自在天造化萬化。故爲大功。今破除之。自在不能造化。故云亡也。

理極於虛位。則喪我於二際。

理極於虛位。明法無我。喪我於二際者。破人令得